



**D'Schnapsbagge 2006**

Dr Papscht schreyt voller Angscht: "Was mache die Schwizer jetz?  
Jetzt sage die joo zu somene Partnerschaftsgsetz!"  
Das grad är das so sait - finde mir nit emol eso drnäbe,  
denn als Schwoob hesch halt wenig Partner im Läbe.

Wenn dr Roger Federer seh'sch spile, griegsch e wohlige Schauer,  
au bi Gool vo Frei und Streller meriggsch dr Baselbieter Power.  
Dr Stadtkanton ka do numme dr Morin und dr Lewin biete,  
die hän zwar kai Power - das sin aifach nur ....glatti Sieche.

Mi Junge luegt als d'Kinderstund, zwische fünf und säggs,  
furchtbari Angscht het är vor dr alte, schwarze Häx.  
Mit folgende Wort ha'nen treeschtet - dä isch moralisch völlig dunde  
"Lueg dr SVP-Vorstand z'Basel - deert isch d'Häx jetzt au verschwunde".

Dr Jörg Schild wird unsere heggschte Sportler, aber nit numme ich dängg,  
wie sell das goh mit sim kinschtliche Kneu und de zwai Sulzer-Hyftglängg?  
Do het doch Swiss Olympic d'Option und ka amene scheene Morge,  
dr Jögge - wenn's en nimm bruucht - mit dr Metallabfuehr entsorge.

D'Zircher hän gruusigi Drämmli und nit ai scheens effentligs WC  
sie hän dr FCZ und - was no viel schlimmer isch - GC.  
Si hän d'Swiss griegt - es isch dr Ospel ko - in дәre Stadt wirrgt - aber da'sch nit ney  
die scheeni Ex-Miss - d'Fiona Hefti - wie e Perle vor de Sey.

Dr Chris von Rohr - дә alti Rogger - mit bedängglige Maniere,  
sott under sim Kopftuech emol frischi Luft lo zirkuliere.  
Wo si Fidle im Färnseh kunnt, rief mi Schwiegermueter enthusiastisch:  
"Scho yber fuffzig und no kai Fältli im Gsicht - дә Typ isch fantastisch!"

(Helge: Aine, wo am Kopf stargg bluetet)  
Dä het nit gege d'Türkey gschuttet - das hän mir yberprieft,  
dä het nit in der Muttenzerkurve "Hopp GC" grieft.  
Dä het nit gege d'Fasnacht gspottet, aber дә het - eso wird's verzellt,  
in ere Baiz im noche Oschte e Coupe Dänemargg bschtellt.

Kyrzlig sehn i e Teenager - s'het mir grad d'Schprooch verschlage,  
in so Schlabberhoose, wo die so luftig um e Arsch umme trage.  
Die tieferglegte Jeans hän e Vortail - mir tschegge das au  
de kasch bekiff in d'Hoose schiffe - es meriggs kai Sau.

Mit hän Usschau ghalte noch tiefere KK-Prämie und andere Sache,  
aifach so Pynggt, wo dr Pasci Couchepin wurde sympathisch mache.  
Mir hän gsuecht.... mir hän gsuecht... all Daag während Stunde,  
da'sch vor drey Joor gsi - mir hän bis hytt no nyt gfunde.

(Uff wälsch) Salut les Bâlois - der Miss Schweiz Romande ist eine schöne Meitli  
nisch nur in die Bikini - auch mit der lange Abendkleidli.  
Un vielleicht sie kann geben - aber tout de suite - c'est vrai,  
der Adress von seine Coiffeur an Micheline Calmy-Rey.

(Umgangssprooch) Hey Mann, tschöss - am Rhy - voll Scheisse und Drägg - e Huffe  
Hey Mann - voll easy - kasch nit liege mit Tussis- und Red Bull suffice  
Aber hey Mann - geil - mi Mueter kennt Ort, wo isch gonggret no vil schlimmer,  
Han'i gfrogt: - "Hey Mann wo?" - sait si voll krass: "Di Zimmer"!